

2 TESALONICENSES

Apóstol Pablopaj Escribiskan

Iscaycaj Carta

Saludo

1 ¹Noka, Pablo, Silvanowan Timoteowan cay cartata escribimuni Tesalónica iglesiapi caj creyentecunaman, Dios Tatanchiswan Señor Jesucristowan ujchaska cachcajcunaman. ²Dios Tatanchis Señor Jesucristopiwan favorninwan sonko tiyaycuyninpiwan kancunata bendicichun.

Dios juchachanka

³Hermanocuna, kancunamanta Diosman graciasta koycupuni. Chayka allin. Creeyniyquichiska wiñachcan, uj ujcuna munanacuyniyquichispas astawan athunyachcan. ⁴Chayraycu nokaycu quiquiycu sonko junt'aska Diospi creyentecunaman parlaycu kancunamanta, pacienciawan creeywan tucuy ñac'ariycunata llaquiycunatapas sufriskayquichismanta. ⁵Cayka ricuchin Diospaj justo cayninta, paypaj gobiernonman yaycunayquichispaj allin caskayquichista; chayraycu sufrichcanquichis.

⁶Dioska cabal, kancuna sufrichejcunata sufrichinanpaj. ⁷Kancuna sufrecunamantaj samariyta kosunquichis nokaycuman jina. Chay samareyka canka Señor Jesús atiyniyoj angelnincunawan riqhurimunan p'unchaypi, nina lauray uqhupi janaj pachamanta jamuchajtin. ⁸Diosta mana jap'ekajcunata, Señorninchis Jesuspaj salvación evangelionta mana casucojcunatapas castigananpaj jamonka. ⁹Paycuna infiernopi wiñaypaj castigaska cankacu, glorioso atiyniyoj Señormanta caruman wijch'uska cankacu. ¹⁰Chay p'unchaypi Señor jamojtin, tucuy creyentecuna payta alabankacu, paymantataj cusicuywan muspharankacu. Kancunapas creyente canquichis, nokaycupaj willaskaycuta creeskayquichisraycu.

¹¹Chayraycu Diosninchismanta mañaspa, kancunapaj oracionta ruwaycupuni, allinpaj jap'inasunquichispaj paypaj wajaskanman jina, pay atiyinwan tucuy sumaj munaskayquichiscunata creeywan ruwaskayquichiscunatawan junt'anapaj. ¹²Chay jinamanta kancunaraycu Señorninchis Jesuspaj sutin alabaska canka. Paytaj honrasunquichis Diosninchispaj Señor Jesucristopaj sumaj cayninman jina.

Señorpaj cutimunanmanta

2 ¹Cunanka, hermanocuna, Señorninchis Jesucristo cutimunanmanta, paywan tantaska cananchismantawan pensayniyquichista ²ama ratolla cambiaychischu. Amataj manchacuychischu, “Señorpaj cutimunan p'unchay chayamunña” nejtincu, willaskaycu, Diosmanta palabraycu, cartaycupas canman jinata nejtincu. ³Ama engañachicuychischu ni imaynamantapas. Manaraj pay cutimuchcajtín, Dios contra ch'ajwaycuna jamonka. Infiernoman wijch'una millay sajra runa riqhurimonka. ⁴Chay chejnicojka jatarenka Diospi tucuy creyentecuna contra, adorana cajcuna contra. Diospaj templonpi gobiernonta churanka, “Dios caní” nispá.

⁵¿Manachu yuyarinquichis kancunawan cachcasparaj caymanta willaskayta? ⁶Cunanka yachanquichis imachus chay sajra cajta jarç'askanta, manaraj tiempopi ama riqhurimunanpaj. ⁷Pacapi cachcaj sajra ruway munaskanta ña ruwachcanña. Chay sajra millay ruwaj runa suyachcan jarç'aj Santo Espiritupaj ithirinallanta. ⁸Chhica riqhurenka chay sajra runaka. Chaywanpas Señor Jesús atiyinwan payta wañuchenka, ñut'onkataj janaj pachamanta glorioso tucuy atiyinwoy riqhurimuyninwan. ⁹Chay millay sajra runaka supay Satanaspaj ruwayninwan jamonka, sinchi atiyinwan, falso señalcunawan, milagrocunawan engañananpaj. ¹⁰Imaymana millayta ruwanka, infiernoman purej runacunata engañananpaj, imaraycuchus paycuna mana munarkancuchu jap'ekayta nitaj munacuyta Cristopaj verdadninta, salvaska canancupaj. ¹¹Chayraycu Dios saken pantaycunawan engañaska canancupaj, llullacunata creenancupaj. ¹²Tucuy chay verdadta mana creey munajcuna mana allincunapi cusicuncu. Chayraycu infiernopi castigaska cankacu.

Salvacionpaj ajllaskacuna

¹³Señorpaj munaskan hermanocuna, kancunaraycu Diosman graciasta koycupuni. Naupajmantapacha Dios ajllarkasunquichis, verdad evangeliota creespa salvaska canayquichispaj, Diosllapaj causachej Santo Espiritupaj ruwaskanwan. ¹⁴Chaypaj Dios wajasunquichis salvación evangeliota willaskaycuwan, Señorninchis Jesucristowan janaj pacha gloriapi canayquichispaj.

¹⁵Ajinaka firme caychis, mana konkapuspa nokaycu quiquinpaj yachachiskaycuta ni escribiskaycutapas. ¹⁶Señorninchis Jesucristo Dios Tatanchispiwan favorninpi munacuwanchis; wiñaypaj cusicuyta kowanchis uj

sumaj suyacuytawan. ¹⁷Dios animasunquichis, firmeta cachisunquichis, tucuy niskayquichis ruwaskayquichispas sumaj cananpaj.

Nokaycupaj oracionta ruwaychis

3 ¹Tucuchanaypaj, hermanocuna, nokaycupaj oracionta ruwaychis, Señorpaj palabran tucuynejman chayanapaj, sumaj jap'ekaska cananpaj, imaynachus kancuna uqhupi carkan jinata. ²Oracionta ruwallaychistaj millay sajra runacunamanta libraska canaycupaj. Achqhayoj mana creencuchu. ³Señorka fiel; pay firmeta cachisunquichis, mana allincunamantataj wakaychasunquichis. ⁴Señorpi confiacuycu kancuna mandaskaycuta casuchcaskayquichista, casunayquichistapas. ⁵Señor yanapasunquichis imaynatachus Dios munacusunquichis ajinallataj munacunayquichispaj, ñac'ariyacunapi Cristopaj pacienciañwan aguantanayquichispapas.

Llanc'anapuni

⁶Hermanocuna, Señorninchis Jesucristopaj sutinpi mandamuyquichis: Mayken mana llanc'ay munaj hermanomanta, yachachiskaycuman jina mana causay munajcunamantapas carunchacuychis. ⁷Yachanquichis imayna causanayquichista nokaycu causaskaycuman jina. Nokaycu causarkaycu kancuna uqhupi llanc'aspapuni. ⁸Pimantapas kasilla miqhorkaycuchu mana pagaspaka. Astawanpas tuta p'unchay sinchita llanc'arkaycu mana kancunata gastachinaycuraycu. ⁹Ciertopuni apóstol jina derechoyoj carkaycu kancuna atandinawayquichispaj; chaywanpas llanc'arkaycu, nokaycu jina llanc'anayquichispaj. ¹⁰Kancunawan cachcaspa, yachacherkayquichis cayta: Mana llanc'ay munajka amallataj miqhuchunchu. ¹¹Uyariycu waquin kancuna mana llanc'aspa causachcaskayquichista, waj runacunapaj asuntoncunaman meticuspa, mana imatapas ruwaspa. ¹²Chay runacunata mandaycu, Señor Jesucristopaj autoridadninwan cunaycutaj: Ama wajcunaman meticuspa llanc'achuncu miqhuska canancupaj.

¹³Hermanocuna, ama sayc'uychischu allincuna ruwayta. ¹⁴Sichus maykenpas cay cartaycupi niskaycuta mana casucunchu chayka, payta reparaychis. Amataj paywan tantacuychischu p'enkachiska cananpaj. ¹⁵Chaywanpas ama enemigota jinaka khawaychischu, manachayri hermanota jina yuyaychaychis.

Pablo despídun

¹⁶Sonko tiyaycu koj Señor quiquin sonko tiyaycuyta kancunaman kosunquichis tucuy tiempopi imaymanapi. Señor tucuy kancunawan cachun.

¹⁷Noka, Pablo, quiquin maquiywan letraywan cay saludoyta escribimuni. Ajinata tucuy cartaycunata firmani; ajinata escribini. ¹⁸Señorninchis Jesucristo favorninwan tucuy kancunata bendicichun. Ajina cachun.